

No. 596. 1369. 26. Aug.

*Markgraf Wilhelm bekennt mit Zustimmung seiner Brüder 6 Schock Groschen von dem vom Rathe zu Leipzig zu zahlenden Jahrgelde an die Capitel zu Erfurt und Meissen wiederkäuflich abgetreten zu haben.*

Wir Wilhelm von gotis gnadin — bekennen vor vns vnde vnser lieben brudere Friderich vnde Balthazar vnde vor alle vnser erbin, daz wir dem erbern herren ern Ditherich von Goch tumhern zcu Erfort, hern Mertin von Torgow tumhern zcu Mizen vnde iren capiteln zcu Erforte vnde zcu Mizen vnde ern Johanse von Eckirperge zcu irrer hant recht vnde redelich vorkouft haben sechs schog rechter iargulde guter Friberscher groschin, die im vnser ratismeistere vnde rad gemeinlich zu Lipczk von irem rathus von vnser rechtin iargulde alle iar ane alle wederrede sullen bezcalen vnde gebin, halb vf send Michels tag vnde halb vf send Walpurg tag, vnde der erste zcins dry schog sullen nu vf send Michels tag der schirst komet geuallen, vnde die andern dry schog darnach vf send Walpurg tag vnuorzogenlich, vnde daz sal ouch alle iar also gehaldin werdin. Wenne ouch dise neste iarfrist vorloyfet vnde wir des vormanet werden von den vorgeanten ern Ditherich von Goch, ern Mertin von Torgow, ern Johans von Eckirperge adir von den, den sie disen brif lizsen, ab sie nicht lenger weren, so sullen wir yn oder den der vnsern brif innehat, ane alle widerrede sechzig schog guter Friberscher groschin bezcalen bynnen einem manden vnde den zcins sechs schog Friberscher groschin dauor wederkoufen, wenne sie den selbin zcins vmbe also vil geldis wede uns gekouft vnde vns ouch daz gelt gereit vnde nuczlich bezalt haben, die bezalunge wir yn ouch sullen tun zcu Mizsin adir zcu Erforte, an welcher stat sie wullen vnuorzoglichen. Sie sullen vns ouch den zcins vor sechzig schog guter Friberscher groschin wede zcu koufen geben wenne wir wollen. Wir globin ouch den vorgeanten hern Ditherich, ern Mertine vnde hern Johanse vnde den capiteln zcu Erfurt vnde zcu Mizsin, daz wir noch nymand von vnser wegin sie an dem selben zcinse vnde gelde sal hindern odir engen mit geistlichem oder werltlichem gerichte adir mit keynerleyge sachin welchley sie weren. Sie sal ouch bynamen nicht beschedigen wedir brant orleyge missewachs adir friheit, ob vnse brudere oder wir die der vorgeanten stad geben, nach keynerleyge sache, wy man die vmmer mag erdenken oder genennen ane argelist, sundern yn sal ye der zcins vnde gelt volgen ane alle hindernisse vnde haben des zcu vrkunde vnser insigel etc. Testes etc. Datum Aldinburg anno domini M°.CCC°.LXIX°. dominica ante Bartholomaei.

Aus dem Liber privileg. im K. Haupt-Staatsarchiv zu Dreden XXX. fol. 6<sup>b</sup>. Die Urkunde ist durchstrichen, weil wahrscheinlich der Rückkauf sehr bald schon stattgefunden hat.